

Bil. 14

Rabu

23 Mac 2022



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGKAL KELIMA
MESYUARAT PERTAMA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Cadangan Menaik Taraf Balai Bomba dan Penyelamat Daerah Tampin**
- YB. Datuk Dr. Hasan bin Bahrom (*Tampin*) (Halaman 1)
- **Klinik Pergigian Bintangor**
- YB. Tuan Wong Ling Bui (*Sarikei*) (Halaman 3)

MALAYSIA
KAMAR KHAS
PARLIMEN KEEMPAT BELAS
PENGGAL KELIMA
MESYUARAT PERTAMA
Rabu, 23 Mac 2022

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

UCAPAN DI BAWAH USUL
BERKENAAN PERKARA TADBIR KERAJAAN (P.M. 17)

**Cadangan Menaik Taraf Balai Bomba
dan Penyelamat Daerah Tampin**

2.34 ptg.

Datuk Dr. Hasan bin Bahrom [Tampin]: *Bismillahi Rahmani Rahim. Assalamualaikum warahmatullahi wabarakatuh.* Terima kasih Tuan Yang di-Pertua. Tajuk ucapan saya 'Cadangan Menaik Taraf Balai Bomba dan Penyelamat Daerah Tampin'.

Tuan Yang di-Pertua, Balai Bomba dan Penyelamat Tampin terletak di bawah Dewan Undangan Negeri kawasan Repah. Ia telah ditubuhkan serta diwartakan pada tahun 1979. Balai Bomba dan Penyelamat Tampin dibina di atas kawasan seluas 03.75 hektar dan ia menempatkan seramai 38 kekuatan anggota. Antara kepentingan naik taraf balai ini adalah perkhidmatannya mencakupi seluas 480 kilometer persegi sehingga menjangkau sebahagian daerah Alor Gajah, Kuala Pilah dan Rembau.

Kedua, saya melihat bahawa kewujudan Stesen Kereta Api Pulau Sebang atau Tampin yang terletak di sempadan pekan Tampin dan menara pencawang telekomunikasi yang berada atas puncak Gunung Tampin merupakan satu indikator terpenting bagi pelaksanaan naik taraf balai bomba ini.

Tuan Yang di-Pertua, ketiga, kebanyakan struktur pada bangunan balai ini dilihat sangat daif dan tidak seiring dengan kriteria sebuah balai bomba dan penyelamat daerah. Di samping itu, terdapat banyak kerosakan seperti keretakan pada luar dan dalam dinding, sistem elektrik dan struktur keseluruhan bangunan lama yang boleh mengancam keselamatan dan kerosakan pada kemudahan seperti sistem paip air, tandas dan kumbahan serta struktur pagar di sekeliling balai mengakibatkan pencerobohan daripada binatang liar dan masyarakat setempat.

Sekiranya tidak dibaik pulih akan menelan perbelanjaan yang tinggi setiap tahun untuk melaksanakan penyelenggaraan. Selain itu, balai ini juga tidak mempunyai fasiliti latihan yang sesuai khususnya untuk meningkatkan keupayaan dan kemahiran anggota yang bertugas.

Tuan Yang di-Pertua, saya sering mengemukakan pertanyaan berhubung kait dengan perkara ini setiap sesi persidangan Parlimen, namun, masih belum menerima jawapan yang tuntas daripada kementerian. Saya difahamkan bahawa naik taraf balai bomba hanya dapat dilaksanakan setelah melebihi 50 tahun pembinaan. Walaupun balai ini masih tidak menjangkau tempoh tersebut, yakni lebih kurang 43 tahun, namun saya berpandangan bahawa naik taraf balai ini seharusnya dinilai berdasarkan fungsi dan masalah yang dihadapi.

Justeru itu, saya berharap agar kementerian dapat mempercepat naik taraf Balai Bomba dan Penyelamat daerah Tampin dalam peruntukan RMKe-12 demi kepentingan dan keselamatan masyarakat sekeliling. Terima kasih, Tuan Yang di-Pertua.

2.38 ptg.

Timbalan Menteri Perumahan dan Kerajaan Tempatan [Dato' Sri Dr. Haji Ismail bin Abd Muttalib]: *Bismillahi Rahmani Rahim. Assalamualaikum warahmatullahi wabarakatuh.* Salam sejahtera, salam Keluarga Malaysia.

Terima kasih Tuan Yang di-Pertua. Terima kasih Yang Berhormat Tampin. Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) ingin menzahirkan ucapan ribuan terima kasih atas keprihatinan Ahli Yang Berhormat berhubung isu penyelenggaraan dan kebajikan anggota bomba yang bertugas di Balai Bomba dan Penyelamat (BBP) Tampin. Kementerian ini bersetuju dan tidak menafikan bahawa faktor keselamatan, keselesaan dan kemudahan yang baik serta lengkap dapat memberi suntikan moral kepada anggota bomba dalam meningkatkan penyampaian perkhidmatan kebombaanan kepada masyarakat.

Untuk makluman Ahli Yang Berhormat, kementerian sentiasa mengambil maklum berhubung keadaan semasa dan keperluan bagi kerja-kerja penyelenggaraan aset tak alih seperti bangunan BBP Tampin yang kini telah menjangkau usia lebih kurang 40 tahun. Dalam memastikan Balai Bomba Tampin dapat beroperasi dan memberi respons kepada masyarakat setempat, suka saya nyatakan di sini bahawa kementerian melalui JBPM telah melaksanakan pelbagai kerja-kerja naik taraf seperti pembinaan *fire engine bay*, pejabat pentadbiran dan pejabat Ketua Balai yang melibatkan peruntukan sebanyak RM100,000.00 pada tahun 2012.

Selain daripada itu, Jabatan Bomba dan Penyelamat Malaysia Negeri Sembilan juga telah menerima peruntukan pembaikan pada tahun 2018 berjumlah RM19,000.00 bagi skop kerja pembaikan pendawaian elektrik, penyaman udara dan kerja mengecat di bahagian dalam Balai Bomba Tampin. Manakala, pada tahun yang berikutnya iaitu 2019, Balai Bomba dan Penyelamat Tampin telah menerima peruntukan berjumlah RM15,943.00 bagi skop kerja pembaikan tandas, tembok pagar dan konkrit *slab* melibatkan *fire engine bay*.

Tuan Yang di-Pertua, merujuk kepada risiko, cabaran dan pembangunan semasa di kawasan Tampin. Sepertimana yang dinyatakan oleh Ahli Yang Berhormat, kementerian melalui Jabatan Bomba dan Penyelamat Malaysia telahpun merancang untuk membuat permohonan menaik taraf Balai Bomba Tampin ini dalam Rancangan Malaysia Kedua Belas (RMKe-12) *Rolling Plan 3* (RP3) dalam tahun 2023 dengan anggaran kos lebih kurang RM4 juta.

Semoga usaha yang murni ini dapat dipertimbangkan oleh Agensi Pusat dan mendapat kelulusan berdasarkan keupayaan peruntukan kewangan semasa. Secara kesimpulannya, sekiranya diluluskan permohonan menaik taraf Balai Bomba dan Penyelamat Tampin ini, anggota bomba akan dapat bertugas dalam suasana tempat kerja yang lebih kondusif di samping dapat melaksanakan latihan dengan lebih efektif dan efisien.

Untuk makluman Ahli Yang Berhormat juga, sebuah Balai Bomba dan Penyelamat kategori 'D' yang baharu telah siap dibina iaitu Balai Bomba dan Penyelamat Kota yang terletak di dalam daerah Rembau dan akan mula beroperasi pada bulan April 2022 dengan kekuatan keanggotaan seramai 28 orang.

Balai Bomba dan Penyelamat Kota ini hanya terletak sejauh 10 kilometer daripada Balai Bomba dan Penyelamat Tampin yang mana dapat membantu memberi perkhidmatan kebombaanan kepada kawasan-kawasan yang di luar capaian masa bertindak (*response time*) Balai Bomba dan Penyelamat Tampin.

Secara tidak langsung juga, dengan beroperasinya Balai Bomba dan Penyelamat Kota ini, khidmat kebombaanan di kawasan Tampin akan dapat diperluas sekali gus meningkatkan keyakinan masyarakat terhadap mutu penyampaian perkhidmatan Jabatan Bomba dan Penyelamat Malaysia. Terima kasih, Tuan Yang di-Pertua.

Klinik Pergigian Bintangor

2.42 ptg.

Tuan Wong Ling Biu [Sarikei]: Terima kasih. Tuan Yang di-Pertua, Klinik Pergigian Bintangor mengalami kesempitan ruangan dan kekurangan fasiliti sepanjang masa manakala klinik menghadapi peningkatan jumlah pesakit setiap tahun.

Memandangkan ruangan Klinik Kesihatan Bintangor yang terhad dan jumlah pesakit semakin meningkat, ruangan bilik menunggu di Klinik Pergigian Bintangor terhad dan sesak untuk pesakit menunggu. Pada masa wabak COVID-19 ini, ruangan yang sempit dan kecil amat bahaya kerana orang ramai tidak dapat menjaga jarak sosial diri sendiri dengan selamat semasa menunggu. Dengan adanya ruangan yang luas, orang ramai akan lebih selesa dan selamat semasa menunggu di bilik menunggu.

Selain itu, ruangan bilik pembedahan di Klinik Pergigian Bintangor yang kecil juga membimbangkan, terutamanya kepada pesakit dan pegawai pergigian. Hal ini kerana doktor gigi tidak dapat memberi fokus yang sepenuhnya kepada pesakit dan selalunya akan terganggu disebabkan oleh ruang yang sempit ini semasa memberikan perkhidmatan kesihatan pergigian.

Jika mendapat ruangan yang besar, doktor gigi dapat lebih fokus semasa menjalankan rawatan dan pesakit juga akan lebih selesa. Di samping itu, Klinik Pergigian Bintangor juga mengalami masalah kekurangan fasiliti yang kecil dan terhad, memandangkan ruangan yang terhad, tiada tempat yang mencukupi untuk meletak kerusi.

Hal ini telah menyebabkan pesakit terpaksa berdiri semasa menunggu giliran mereka. Jika tiada kerusi yang mencukupi untuk pesakit duduk atau pesakit perlu berdiri untuk menunggu giliran, ia akan menyebabkan pesakit berasa letih.

Dengan adanya fasiliti ini, pesakit akan lebih selesa menunggu dan klinik boleh memberi perkhidmatan yang berterusan dan selesa kepada pesakit terutama pesakit dari Bintangor dan Julau.

Tambahan pula, status tanah Klinik Kesihatan Bintangor adalah tanah Kerajaan Persekutuan manakala tempat yang ingin mengembang adalah tanah Kerajaan Sarawak. Hal ini demikian menyebabkan perkembangan klinik adalah terhad kerana pemilik tanah yang tidak sama.

Oleh yang demikian, saya ingin tahu apakah cadangan Menteri Kesihatan terhadap Klinik Kesihatan Bintangor terutama Klinik Pergigian Bintangor? Saya berharap Menteri Kesihatan boleh memberi perhatian terhadap infrastruktur Klinik Pergigian Bintangor kerana kekurangan infrastruktur ini boleh menjejaskan prestasi kakitangan yang bertugas dan juga boleh mengambil tindakan bagi meningkatkan infrastruktur Klinik Pergigian Bintangor supaya orang ramai boleh mendapat perkhidmatan yang berkualiti dan persekitaran yang selesa. Sekian, terima kasih.

2.46 ptg.

Timbalan Menteri Kesihatan II [Datuk Aaron Ago Dagang]: Terima kasih Yang Berhormat Sarikei. Tuan Yang di-Pertua, untuk makluman, Klinik Kesihatan Bintangor merupakan satu-satunya klinik di daerah Meradong, Bahagian Sarikei. Ia merupakan klinik kesihatan jenis 4 yang telah beroperasi sejak tahun 1973.

Klinik ini mempunyai liputan populasi seramai 25,000 penduduk dan kedatangan harian seramai 280 orang pesakit. Klinik ini terletak kira-kira 17 kilometer dari bandar Sarikei. Perkhidmatan Kesihatan Pergigian merupakan salah satu perkhidmatan yang disediakan di Klinik Kesihatan Bintangor. Klinik Pergigian di KK Bintangor dilengkapi dengan dua buah kerusi pergigian yang pada asalnya ditempatkan bersama di dalam satu bilik.

Pada tahun 2021, bilik rawatan telah diubah suai menjadi dua bilik rawatan tertutup bagi mematuhi keperluan SOP rawatan penyakit berjangkit untuk mengawal penularan wabak COVID-19. Sebelum pandemik COVID-19, ruang menunggu klinik pergigian dapat memuatkan seramai 12 ke 14 orang pesakit pada satu masa. Namun, bagi mengamalkan penjarakan fizikal, ruang menunggu telah dihadkan kepada 6 ke 8 orang pesakit sahaja pada satu masa. Purata kedatangan pesakit di Klinik Pergigian Bintangor adalah seramai 20 hingga 25 orang sehari.

Oleh itu, pesakit adalah digalakkan untuk hadir ke klinik pergigian secara berperingkat (*staggered*) mengikut masa janji temu yang ditetapkan bagi mengelakkan kesesakan di klinik. Pesakit janji temu adalah seramai enam ke tujuh orang sehari. Walau bagaimanapun, sebagai persediaan ke Fasa Endemik, kedua-dua bilik rawatan ini mempunyai fungsi yang sama iaitu untuk janji temu dan pesakit luar. Secara amnya, Kementerian Kesihatan Malaysia (KKM) dan khususnya Bahagian Kesihatan Pergigian Negeri Sarawak telah merancang untuk menaik taraf fasiliti ini.

Walaupun bagaimanapun, disebabkan kekangan peruntukan, keutamaan telah difokuskan terhadap kerja-kerja naik taraf fasiliti berkaitan pencegahan bagi menangani penularan wabak COVID-19. Sebagai alternatif, Perkhidmatan Kesihatan Pergigian boleh juga diakses di dua fasiliti lain yang berdekatan iaitu di

Klinik Pergigian Sarikei yang mempunyai empat kerusi pergigian dan Klinik Pergigian di Hospital Sarikei yang mempunyai tiga unit kerusi pergigian.

Kedua-dua fasiliti ini terletak dalam lingkungan 17 hingga 20 kilometer dari Klinik Pergigian Bintangor. Kementerian Kesihatan Malaysia sentiasa berusaha untuk memberikan perkhidmatan yang terbaik untuk rakyat. Untuk memastikan orang ramai boleh mendapat perkhidmatan yang berkualiti dan persekitaran yang selesa, kemudahan rawatan pergigian akan ditambah baik dari masa ke masa. Walau bagaimanapun, perkara ini adalah tertakluk kepada ruang sedia ada serta kebenaran dan juga kelulusan untuk pengubahsuaian.

Untuk makluman Tuan Yang di-Pertua, saya telah pun berbincang dengan Yang Berhormat Sarikei, kita sudah berjanji untuk berjumpa di Klinik Kesihatan Bintangor pada 31 Julai. *Please be around*. Sekian, terima kasih.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, esok, Khamis, 24 Mac 2022. Terima kasih Ahli-ahli Yang Berhormat.

[Kamar Khas ditangguhkan pada pukul 2.50 petang]